

考工典



考工典第一百十七卷

園林部彙考一

述異記 芙蓉園

芙蓉園在洛陽漢家置之長沙定王故宮有蓼園真定王故園也

梧桐園

梧桐園在吳宮本吳王夫差舊園也一名鳴琴川

洛陽名園記 富鄭公園

洛陽園池多因隋唐之舊獨富鄭公園最爲近闢而景物最勝游者自其第東出探春亭登四景堂則一園之景勝可顧覽而得南渡通津橋上方流亭望紫筠堂而還右旋花木中有百餘步走蔭樾亭賞幽臺抵重波軒而止直北走土筠洞自此入大竹中凡謂之洞者皆斬竹丈許引流穿之而徑其上橫爲洞一曰土筠縱爲洞三曰水筠曰石筠曰榭筠歷四洞之北有亭五錯列竹中曰叢玉曰披風曰漪嵐曰夾竹曰兼山稍南有梅臺又南有天光臺臺出竹木之杪遵洞之南而東還有臥雲

堂堂與四景堂並南北左右二山背壓通流凡坐此則一園之勝可擁而有也鄭公自還政事歸第一切謝賓客燕息此園幾二十年亭臺花木皆出其目營心匠故逶迤衡直闔爽深密皆曲有奧思

### 董氏西園

董氏西園亭臺花木不爲行列區處周旋景物歲增月葺所成自南門入有堂相望者三稍西一堂在大地間逾小橋有高臺一又西一堂竹環之中有石芙蓉水自其花間湧出開軒牕四面甚蔽盛夏燠暑不見畏日清風忽來留而不去幽禽靜鳴各誇得意此山林之景而洛陽城中遂得之於此小路抵池池南有堂面高亭堂雖不宏大而屈曲甚邃游者至此往往相失豈前世所謂迷樓者類也元祐中有留守喜宴集於此

### 董氏東園

董氏以財雄洛陽元豐中少縣官錢糧盡籍入田宅城中二園因蕪壞不治然其規模尙足稱賞東園北鄉入門有栢可十圍實小如松實而甘香過之有堂可居董氏盛時載歌舞游之醉不可歸則宿此數十日南有敗屋遺址獨流盃寸碧二亭尙完西有大池中爲堂榜之曰含碧水四面噴瀉池

中而陰出之故朝夕如飛瀑而池不溢洛人盛醉者走登其堂輒醒故俗目曰醒酒池

### 環溪

環溪王開府宅園甚潔華亭者南臨池池左右翼而北過涼榭復匯爲大池周圍如環故云然也榭南有多景樓以南望則嵩高少室龍門大谷層峯翠巘畢効奇於前榭北有風月臺以北望則隋唐宮闕樓殿千門萬戶峩嶢璀璨延亙十餘里凡左太冲十餘年極力而賦者可瞥目而盡也又西有錦廳秀野臺園中樹松檜花木千株皆品別種列除其中爲島隄使可張幄次各待其盛而賞之涼榭錦廳其下可坐數百人宏大壯麗洛中無逾者

### 劉氏園

劉給事園涼堂高卑制度適愜可人意有知木經者見之且云近世建造率務峻立故居者不便而易壞唯此堂正與法合西南有臺一區尤工緻方十許丈地而樓橫堂列廊廡回縵欄楯周接木映花承無不妍穩洛人目爲劉氏小景今析爲二不能與他園爭矣

### 叢春園



今門下侍郎安公買於尹氏岑寂而喬木森然桐梓檜柏皆就行列其大亭有叢春亭高亭有先春亭叢春亭出茶靡架上北可望洛水蓋洛水自西洶湧奔激而東天津橋者疊石爲之直力溜其怒而納之於洪下洪下皆大石底與水爭噴薄成霜雪聲聞數十里予嘗窮冬月夜登是亭聽洛水聲久之覺清冽侵人肌骨不可留迺去

### 天王院花園子

洛中花甚多種而獨名牡丹曰花王凡園皆植牡丹而獨名此曰花園子蓋無他池亭獨有牡丹數十萬本凡城中賴花以生者畢家於此至花時張幕幄列市肆管絃其中城中士女絕烟火游之過花時則復爲丘墟破垣遺甃相望矣今牡丹歲益滋而姚黃魏紫一枝千錢姚黃無賣者

### 歸仁園

歸仁其坊名也園盡此一坊廣輪皆里餘北有牡丹芍藥千株中有竹百畝南有桃李彌望唐丞相牛僧孺園七里檜其故木也今屬中書李侍郎方朔亭其中河南城方五十餘里中多大園池而此爲冠

## 苗帥園

節度使苗侯旣貴欲極天下佳處卜居得河南河南園宅又號最佳處得開寶宰相王溥園遂構之園旣古景物皆蒼老復得完力藻飾出之於是有欲憑陵諸園之意矣園故有七葉二樹對峙高百尺春夏望之如山然今剏堂其北竹萬餘竿皆大滿二三園疎筠琅玕如碧玉椽今剏亭其南東有水自伊水派來可浮十石舟今剏亭壓其溪有大松七今引水繞之有池宜蓮荇今剏水軒板出水上對軒有橋亭制度甚雄侈然此猶未盡得王丞相故園水東爲直龍園閣趙氏所得亦大剏第宅園池其間稍北曰剏鄢陌陌列七丞相之第文潞公程丞相宅旁皆有池亭而趙韓王園獨可與諸園列

## 趙韓王園

趙韓王宅園國初詔將作營治故其經畫制作殆侔禁省韓王以太師歸是第百日而薨子孫皆家京師罕居之故園池亦以扁鑰爲常高亭大榭花木之淵藪歲時獨廝養擁簪負舂鐻者於其間而已蓋人之於宴閒每自吝惜宜甚於聲名爵位

李氏仁豐園

李衛公有平泉花木記百餘種耳今洛陽良工巧匠批紅判白接以他木與造化爭妙故歲歲益奇且廣桃李梅杏蓮菊各數十種牡丹芍藥至百餘種而又遠方奇卉如紫蘭茉莉瓊花山茶之儔號爲難植獨植之洛陽輒與其土產無異故洛中園圃花木有至千種者甘露院東李氏園人力甚治而洛中花木無不有中有四并迎翠濯纓觀德超然五亭

松島

松柏樅杉檜栝皆美木洛陽獨愛栝而敬松松島數百年松也其東南隅雙松尤奇在唐爲袁象先園本朝屬李文定公丞相今爲吳氏園傳三世矣頗葺亭榭池沼植竹木其旁南築臺北構堂東北曰道院又東有池池前後爲亭臨之自東大渠引水注園中清泉細流涓涓無不通處在他郡尙無有而洛陽獨以其松名

東園

文潞公東園本藥圃地薄東城水渺瀰甚廣汎舟游者如在江湖間也淵映瀍水二堂宛宛在水中



湘屑藥圃二堂間列水石西去其第里餘今潞公官太師年九十尙時杖屨游之

### 紫金臺張氏園

自東園並城而北張氏園亦繞水而富竹木有亭四河圖志云黃帝坐元扈臺郭璞云在洛汭或曰此其處也

### 水北胡氏園

水北胡氏二園相距十許步在邙山之麓漣水經其旁因岸穿二土室深百餘尺堅完如埏埴開軒牕其前以臨水上水清淺則鳴漱湍瀑則奔駛皆可喜也有臺榭花木率在二室之東凡登覽徜徉俯瞰而峭絕天授地設不待人力而巧者洛陽獨有此園耳但其亭臺之名皆不足載載之且亂實如其臺四望盡百餘里而縈伊瀋洛乎其間林木蒼蔚煙雲掩映高樓曲榭時隱時見使畫工極思不可圖而名之曰玩月臺有庵在松檜藤葛之中闢旁牖則臺之所見亦畢陳於前避松檜寧藤葛的然與人目相會而名之曰學古庵其實皆此類

### 大字寺園



大字寺園唐白樂天園也樂天云吾有第在履道坊五畝之宅十畝之園有水一池有竹千竿是也  
今張氏得其半爲會隱園水竹尙甲洛陽但以其圖攷之則某堂有某水某亭有某水其水其木至  
今猶存而曰堂曰亭者無復彷彿矣豈因於天理者可久而成於人力者不可恃耶寺中樂天石刻  
存者尙多

獨樂園

司馬溫公在洛陽自號迂叟謂其園曰獨樂園園卑小不可與他園班其曰讀書堂者數十椽屋澆  
花亭者益小弄水種竹軒者尤小曰見山臺者高不過尋丈曰釣魚庵曰採藥圃者又特結竹鈔落  
蕃蔓草爲之爾溫公自爲之序諸亭臺詩頗行於世所以爲人欣慕者不在於園耳

湖園

洛人云園圃之勝不能相兼者六務宏大者少幽邃人力勝者少蒼古多水泉者艱眺望兼此六者  
惟湖園而已予嘗游之信然在唐爲裴晉公宅園園中有湖湖中有堂曰百花洲名蓋舊堂蓋新也  
湖北之大堂曰四并堂名蓋不足勝蓋有餘也其四達而當東西之蹊者桂堂也截然出於湖之右

者迎暉亭也過橫池披林莽循曲徑而後得者梅臺知止庵也自竹逕望之超然登之修然者環翠亭也渺渺重窳循擅花卉之盛而前據池亭之勝者翠樾軒也其大略如此若夫百花酣而白晝炫青蘋動而林陰合水靜而跳魚鳴木落而羣峯出雖四時不同而景物皆好則又其不可殫記者也

### 呂文穆園

伊洛二水自東南分注河南城中而伊水尤清澈園亭喜得之若又當其上流則春夏無枯涸之病呂文穆園在伊水上流木茂而竹盛有亭三一在池中二在池外橋跨池上相屬也洛陽又有園池中有一物特可稱者如大隱莊梅楊侍郎園流杯師子園師子是也梅蓋早梅香甚烈而大說者云自大庾嶺移其本至此流杯水雖急不旁觸爲異師子非石也入地數十尺或以地攷之蓋武后天樞銷鑠不盡者也舍此又有嘉猷會節恭安溪園等皆隋唐官園雖已犁爲良田樹爲桑麻然宮殿池沼與夫一時會集之盛今遺俗故老猶有識其所在而道其廢興之端者游之亦可以觀萬物之無常覽時之倏來而忽逝也

約齋燕遊志 淳熙丁未秋余舍所居爲梵剎爰命桂隱堂館橋諸池名各賦小詩總八十餘首逮



慶元庚申歷十有四年之久匠生於心指隨景變移徙更葺規模始全因刪易增補得詩凡數百  
綱舉而言之東寺為報上嚴先之地西宅為安身攜幼之所南湖則管領風月北園則娛宴賓親  
亦庵神居植福以資淨業也約齋畫處觀書以助老學也至於暢懷林泉登賞吟嘯則又有眾妙  
峯山包羅幽曠介于前六者之間區區安身嗜靜之志造物亦不相負矣或問予曰造物不負子  
子其惡負造物哉釋名宦之拘囚享天真之快適要當於筋骨未衰時今子三仕中曹顛華齒墜  
涉筆總無十二旬如之何則可余應之曰仕雖多不使勝閒日余之願也余之幸也敢不勉施王  
戊歲仲夏張鑑功父書

東寺

勅為廣壽慧雲

大雄尊閣

千佛像

靜高堂

寢室

真如軒

種竹

西宅

叢奎閣

安奉被賜四朝宸翰

德勳堂

祖廟以高宗御書二字名

儒聞堂

前堂用告詞取名

現樂堂

中堂用朱岩壑語

安閒堂

後堂

瀛巒勝處

東北小堂前後山水

綺互亭

有四小軒

柳堂花院

應鉉齋 筮得鼎卦故名

振藻 取告詞中字名

宴頤軒

尙有軒

賞真亭 山水

亦菴

法寶千塔 鐵鑄千塔藏經千卷

如願道場 藥師佛壇

傳衣軒

寫經寮 書華嚴等大乘諸經

約齋

泰定軒

煙波觀

南湖

御風橋 十間

閨春堂 牡丹芍藥

把菊亭

天鏡亭 水心

星槎 舟名

鷗渚亭

泛月闕 水門

北園

羣仙繪幅樓 前後十一間下臨丹桂五六十株盡見江湖諸山

桂隱 諸處總名今揭樓下

清夏堂

玉照堂 梅花四百株

蒼寒堂 青松二百株

艷香館 雜春花百餘株

碧宇 修竹十畝

水北書院 對山臨溪

界華精舍 夢中得名

撫鶴亭 近松株

芳草亭 臨池



味空亭 臘梅

垂雲石 高二丈廣十四尺

攬月橋

飛雲橋 在林

藥珠洞 茶藤二十五株

芙蓉池 紅蓮十畝四面種芙蓉

珍林 雜果小園

涉趣門 總門入松徑

安樂泉 竹間井

杏花莊 村酒店

鵲泉 井名

衆妙峯山

詩禪堂

黃靈洞天

景白軒

文光軒 臨池

綠畫軒 木屏臨側

書葉軒 柿二十株

俯窠軒

無所要軒

長不昧軒

摘星軒

餐霞軒 櫻桃三十餘株

讀易軒

詠永軒 道德經

凝薰堂

楚佩亭 蘭

宜雨亭 千葉海棠二十株夾流水

滿霜亭 橘五十餘株

聽鶯亭 柳邊竹外

千歲菴 仁皇飛白字

恬虛菴

憑暉亭

美芝亭

都徽別館 誦度人經處經乃徽宗御書

水湍橋

漪風洞

施無畏 觀音銅像

澄霄臺 面東

登獻臺

金竹岩

隱書岩 石五仙書在岩穴中可望不可取

古雪岩

新岩

疊翠亭

茂林中容  
十許人坐

釣磯

菖蒲澗

上有小  
石橋

中池

養金魚  
山澗中

珠旒瀑

藏丹谷

煎茶磴

吳興園林記

吳興山水清遠昇平日士大夫多居之其後秀安僖王府第在焉尤爲盛觀麓中二

溪橫貫此天下之所無故好事者多園池之勝倪文節經鉏堂雜志嘗紀當時園圃之盛余生晚

不及盡見而所見者亦有出於文節之後今據城之內外常所經遊者列於後亦可想像昨夢也

### 南沈尙書園

沈德和尙書園依南城近百餘畝果樹甚多林擒尤盛內有聚芝堂藏書室堂前鑿大池幾十畝中有小山謂之蓬萊池南豎太湖三大石各高數丈秀潤奇峭有名於時其後賈師憲欲得之募力夫數百人以大木構大架懸巨絙縋城而出載以運舫涉溪絕江致之越第凡損數夫其後賈敗官斥賣其家諸物獨此石臥泥沙中適王子才好之請買於官募工移植其費不貲未幾有指爲盜賣者省府追逮幾半歲所費十倍於石遂復昇還之可謂石妖矣

### 北沈尙書園



沈賓王尙書園正依城北奉勝門外號北村葉水心作記園中鑿五池三面皆水極有野意後又名之曰自足有靈壽書院怡老堂溪山亭對湖臺盡見太湖諸山水心嘗評天下山水之美而吳興特爲第一誠非過許也

章叅政嘉林園

外祖文莊公居城南後依南城有地數十畝元有潛溪閣昔沈晦崑清臣故園也有嘉林堂懷蘇書院相傳坡翁作守多游於此城之外別業可二頃桑林果樹甚盛濠濮橫截車馬至者數返復有城南書院然其地本郡志之南園後廢出售於民與李寶謨者各得其半李氏者後歸牟存齋

牟端明園

本郡志南園後歸李寶謨其後又歸牟存齋園中有碩果軒

大梨一株

元祐學堂芳菲二亭萬鶴亭雙杏

亭桴舫齋岷峩一畝宮宅前枕大溪曰南漪小隱

趙府北園

舊爲安僖故物後歸趙德勤觀文其子春谷文曜葺而居之東浦書院桃花流水薰風池閣東風第

一梅等亭正依臨湖門之內後依城城上一眺盡見具區之勝

### 丁氏園

丁總領園在奉勝門內後依城前臨溪蓋萬元亭之南園楊氏之水雲鄉合二園而爲一後有假山及砌臺春時縱郡人遊樂郡守每歲勸農還必於此艤舟宴焉

### 蓮花莊

在月河之西四面咸水荷花盛開時錦雲百頃亦城中之所無也昔爲莫氏產今爲趙氏

### 趙氏菊坡園

新安郡土之園也昔爲趙氏蓮莊分其半爲之前面大溪爲修堤畫橋蓉柳夾岸數百株照影水中如鋪錦繡其中亭宇甚多中島植菊至百種爲菊坡中甫二卿自命也相望一水則其宅在焉舊爲曾氏極目亭最得觀覽之勝人稱曰八面曾家今名天開圖書

### 程氏園

程文簡尚書園在城東宅之後依東城水濠有至游堂鷗鷺堂芙蓉涇



丁氏西園

丁葆光之故居在清源門之內前臨茗水築山鑿池號寒崑一時名士洪慶善王元渤俞居易芮國器劉行簡曾天隱諸名士皆有詩臨茗有茅亭或稱爲丁家庵

倪氏園

倪文節尙書所居月河卽其處爲園池蓋四至傍水易於成趣也

趙氏南園

趙府三園在南城下與其第相連處勢寬閒氣象宏大後有射圃崇樓之類甚壯

葉氏園

石林右丞相族孫溥號克齋者所創在城之東多竹石之勝

李氏南園

李鳳山叅政本蜀人後居雪因創此爲遨遊之地中有傑閣曰懷岷穆陵御書也

王氏園